




702



唐吕和叔文集
—



Inches 1 2 3 4 5 6 7 8



Centimetres 1 2 3 4 5 6 7 8 9 10 11 12 13 14 15 16 17 18 19

Blue Cyan Green Yellow Red Magenta White 3/Color Black

TIPPEN Color Control Patches


© The Tiffen Company, 2007





呂和叔文集十卷

四部叢刊集部



上海涵芬樓借常熟
瞿氏藏述古堂景宋
鈔本印行原書葉心
高營造尺六寸五分
寬四寸二分

唐呂和叔文集序

彭城劉禹錫撰


五行秀氣得之居多者為萬人其色激灑於顏間其聲發
而為文章天之所與有物來相彼由學而致者如工人染
夏以視羽畎有生之死矣初貞元中天子之文章煥乎
垂光慶霄在上萬物五色天下文人為氣所召其生乃著
靈芝筮脯與百果齊折然煌煌翹翹出乎其類終為偉人
者幾希矣東平呂和叔寔生是時而絕人遠甚始以文學
震三川三川守以為貢士之冠名聲四馳速如羽檄長安
中諸生咸避其鋒兩科連中芒刃愈出德宗聞其名自集
賢殿校書郎擢為左拾遺明年大戎請和上問能使絕域

者君以奇表有專對才膺選轉殿內史錫之銀章還拜尚書戶部員外郎轉司封遷刑部郎中兼侍御史副治書之職會中執法左遷緣坐謫道州刺史以善政聞改衡州年四十而歿後十年其子安衡位奉遺草來謁咨予細之成一家言凡二百篇和叔名溫別字化光祖考皆以文學至大官早聞詩禮于先侍郎又師吳郡陸楨通春秋從安定梁肅學文章勇于藝能咸有所祖年益壯志益大遂撥去文字與雋賢交重氣槩數名寔忻然以致君及物為大欲每與其徒講疑攷要皇王霸強之際臣子忠孝之道出入上下百千年間詆訶角逐叠發連拄輒盱衡擊節揚袂頓足信容得色舞于眉端以為按是言循是理合乎心而氣

錢遵王述古堂藏書

將之昭昭然若揭日月而行孰能闕其勢而爭天光者嗚呼言可信而時異道甚長而命窄精氣為物其有所歸乎古之為書者先立言而後體物賈生之書首過秦而荀卿亦後其賦和叔年少過君而卒以譎似賈生能明王道似荀卿故余所先後視二書斷自人文化成論至諸葛武侯廟記為上篇佗咸有為為之始學左氏書故其文微為富艷夫羿之闢弓惟巴蛇九日乃能盡其殼而回注鸚鵡亦要中於尋常之間非羿之於弓有能有不能所遇而然也後之達解者推而廣之知予之素交不相索於文字之內而已

錢遵王述古堂藏書



呂和叔文集目錄

朝議郎使持節衡州諸軍事守衡州刺史上騎都尉賜緋魚袋呂溫

第一卷

賦詩

繇鹿賦

并序

白雲起封中詩

月中聞磬聲詩

青出藍詩

秋日臺中寄懷

聞雅琴書事

聽山鵲

黃龍負舟賦

樂理心賦

鑒止水賦

早朝候傳點書懷

望白山作

惜花絕句

詠鴈

題尋真觀書院

寄李六協律

寄竇三端公

著中回寄親友

吐蕃列館卧病

中和日寄舊僚

及第後答主人

浴後贈主人

看渾中丞桃花

贈友人

北橋新亭書懷

題道州知縣廳事

訓別江華毛令

訪尚叅軍林園

訓何處士

涼夜書情

訓何處士書情

戲贈靈澈上人

貞元舊節有感

答崔三題海陽亭

答段秀才

宗禮苦雨戲贈

錢遵王述古堂藏書

道州寄裴相公

第二卷

詩

吐蕃列館月夜

望恩臺作

關河亭作

鞏路感懷

題梁宣帝陵二首

岳陽懷古

道州途中即事

少陵原望秦中

祭南岳

何源軍漢村作

題河州赤岸村

題陽入城

昔王龍驤墓

題石勒城二首

劉郎浦口號

自江華之衡陽

送楊七錄事

送范司空

送文暢上人

送宗禮南行

送段九秀才

送李十一兵曹

送袁七書記

江陵醉中留別

送何山人

送戴簡處士

遊郭駙馬亭子

舍弟失囚共飲

櫻蕊未拆賦詩

衡州登樓望花

傷合江亭剪刀

遊歐陽家林亭

蚤春遊黃溪

衡州把火看花

看花招客不至

順宗挽歌詞三首

詠蜀客石琴枕

賦得鄉飲酒詩

錢遵王述古堂藏書

賦得失群鸛

道州南樓換柱

道州北池放鵝

回風有懷

蕃中春暈渾詞

上官昭容書樓歌

聞砧有感

蚤覺有懷

冬日病中即事

病中轉司封

書衡中即事

城北樓觀李花

南樓即事

道州觀野火

衡州蚤春七首

郡內書懷

偶然作二首

古興

風咏

道州感異

與李六聯句

鏡中嘆白髮

聽歌有感

早甚見權門移芍藥花

冬夜即事

道州郡齋卧疾

讀小弟詩有感

讀句踐書

道州月嘆

風嘆

第三卷

書序

請學春秋書

上族叔齊河南書

代與嚴僕射書

代與韓司空書

代與張尚書書

代與劉尚書書

代與子相公書

地里志序

送友人遊蜀序

送琴客序

錢遵王述古堂藏書

聯句詩序

送薛大信序

律令要錄序

裴氏海昏集序

第四卷

表

代論代劍南更發兵表

代賀德政表

代進集註春秋表

代賀遷二祖表

謝拾遺表

謝章服表

代賀順宗登極表

代上尊號第三表

代謝宣示元和觀象曆表

代賀放浙西租賦表

代謝許遊宴表

代進農書表

代司徒謝上表

代賀赦表

第五卷

表狀

代賀收西川表

代謝內庫錢充軍資表

代

代賀生擒李錡表

代謝捨旗等表

代謝借飛龍馬表

代起居表

代謝授刺史表

道州謝上表

賀冊皇太子表

衡州謝上表

代謝上表

代奏吐蕃事宜狀

代奏請女正度狀

代謝賜戟狀

代請刪定開元禮狀

錢遵王述古堂藏書

崔公行狀

第六卷

誌銘

三受降城碑銘

韋府君神道碑銘

劉公神道碑銘

南嶽大師塔銘記

韋公神道碑銘

第七卷

誌銘

鄭夫人墓誌銘

大長公主墓誌銘

李夫人墓誌銘

柳夫人墓誌銘

陳先生墓表

呂府君權殯記

名和叔集目錄

五

第八卷

銘文

傳巖銘

古東周城銘

謁舜廟文

代祭樊襄陽文

祭陸給事文

祭侯官房叔文

望思臺銘

成阜銘

酈王景略文

代祭齊相公文

祭邵助費念文

祭溺死百姓文

第九卷

頌讚

凌烟閣勳臣頌

皇帝親庶政頌

錢遵王述古堂藏書

第十卷

雜著

立廬陵王傳讚

續羊叔子傳讚

張荊州畫讚

藥師如來繡像讚

功臣恕死議

人文化成論

魏州三堂記

道州刺史廳記

復漢以粟為賞罰議


三不欺先後論

諸葛武侯廟記

湖南都團練廳壁記

呂和叔文集目錄

錢遵王述古堂藏書



吕和叔文集卷第一



朝議郎使持節衛州諸軍事守衛州刺史上騎都尉賜緋魚袋呂溫詩賦

蘇鹿賦 并序

貞元己卯歲予南出獐樊之間遇野人繫鹿而至者問

詰之荅曰此為由鹿由此鹿以誘致群鹿也備言其狀且

曰此鹿每有所致輒鳴嗥不飲食者累日余喟然曰虞之

即鹿也必以其類致之人之即人也亦必以其友致之寔

繁有徒古之一一作從古然矣嗟夫鹿無情而猶知一作痛傷人

與謀而宴安殘酷彼何人斯彼何人斯物微感深遂作賦

曰

鹿之生兮亦稟亭毒備齒角而無競循性情而自牧姑有
昧於行止尚焉知乎倚伏捨爾崇林輕遊近麓偶巧網之
生致蒙主人之全育飲以潔井飼于芳庭寢訖荃菜騰倚
蘭馨露往霜來日安月寧雖矯性而非樂終感恩而不驚
曾不知養非玩物用有深意命之曰繇俾陷其類京秋八
月爽景清氣羈致山阿縻于蹊隧設伏以待翳叢而伺同
氣相求誘之孔易將必慕侶豈云貪餌吻吻和去聲鳴麀麀
狎至彼泯慮於猜信此無情於誠偽孰是倉卒禍生所忽
毒鏑歛以星貫潛機劃其電發或洞背而達腋或折足而
碎骨望林密分非遠爾時曠兮未減威嗥澤而北至今一作
迅日掩山而西沒走駭侶於巖煙叫飢靡于澗月苟行路

錢遵王述古堂藏書

之聞者孰不心摧而思絕相爾由矣野心而仁望純東而
驚顧隨獲車而遠巡視鼎中之消燭觀柝上之割分忽哀
鳴以感類若沉痛之在身雖復處之密適享以豐珍比檻
猿之駭躍同海鳥之愁辛敢擇蔭而後死思走險其何因
痛無知以相陷舍悅毒而莫申容有感而言曰物誠有諸
人亦宜乎撫事或比原心即殊借如淮陰構禍寃在神理
通說且拒狝謀寧起堂一蕭公寔曰知已給致鍾室寧胡
忍此呂祿之難誰非漢臣交則不義賣亦不仁彼美酈生
既為交親誘襲軍印豈無他人於戲微獸傷類如不自容
伊人賣友以享其功滅交道兮墜義風曾麋鹿之不若何
仁信之可宗已焉哉諒此世之茫、吾未見其始終

黃龍負舟賦 克已動物大川功靈為龍

夏后氏奠山疏川拯溺開泰玄珪錫命既成天下之功黃

龍發祥一作始耀域中之大當其駐軫江甸艤舟洪川天

行健而時有未濟地設險而瞻之在前思利涉以撫俗遂

精誠而告虔于是雲氣鬱起神光爛然奮鬣於勿用之窟

驥首於或躍之泉安波澄灑奉天意以顯若拖尾垂鬣夾

王舟而負焉合靈符於百代表聖運於千年徒偉夫出無

情馳不測如驅風雷若有羽翼視竭誠以効用似就列而

陳力電目流光金鱗耀色天吳奔走陽侯屏息巨險迄濟

孰假剡木之能潛怪莫逢寧資畫鷁之飾應變化以昭感

出沉潛而剛克其慶惟大賴祉福者兆人其觀惟榮執玉

錢遵王述古堂藏書

帛者萬國若非平水湮土泣辜罪已菲飲食以昭儉卑宮
室而思理德掩乎生成之初功齊乎開闢之始則安有非
常之神物不召而萃止濟其不通而彰其具美者也至如
漢橫汾水秦抵滄溟寔逞心欲匪崇德馨生人之蓋瘁靡
念方士之空言是聽姑幸免於覆溺夫何望乎炳靈於戲
動周軌道言非善教則人雖愚弱或使之而不効其志惟
純其德孔殷則龍雖神化將不從而自勤信矣哉國家俾
人其蘇在理無鬱超乎大禹不務舟車之勞宛彼黃龍但
為宮沼之物而已

白雲起封中詩

題中用韻六十字成

封閭白雲起漢帝坐齋宮望在金泥上疑生秘玉中攢柯

初縹繞布葉漸蒙籠日觀祥光合天開瑞氣通無心已出
岫有勢欲凌風儻遣成膏澤欲茲遍大空

吏部試樂理心賦

易五子諫油然而生為韻

道無象天無聲聖不有作曷觀化成于是鼓吹大塊鑑錙
元精因乎心而式是理本形乎器而強為樂名以齊五方
之俗以厚萬物之生始積中而發外卒克性而約一作情
樂與心冥則斯曰固天之縱心由樂理亦得夫自明而誠
至若樂在朝廷君臣叶義一發而陽唱陰和九變而雲行
雨施上以見為君之難下以知為臣之不易有國者理心
以此必獲儀鳳之嘉瑞若乃樂在閭閻父子靜專蓋取諸
無荒而樂有節而宣和以嚴濟愛由敬全有家者理心以

效遵王達古堂藏書

此必反天性於自然且夫樂之作也一動一息樂之理也
惟清惟直然後能在聽而必聰無入而不得節有序觀貫
珠而匪珠聲成文見五色于無色其或惟邪是念惟愚是
蒐則雖琴瑟在御管磬聿脩立樂之方既失理心之術何
求亦焉望變澆風之浩浩致和氣之油油徒觀其心尚玄
通樂資交暢明贊天地之化育幽索鬼神之情狀會節有
極象之則動而時中應變無方擬之則貞而不諫至矣哉
至樂希夷俟其禱而聽之以心固不專於子野作不在德
亦無俟於后夔方今敦和統同反本復始辨六律以分職
齊八風而同軌洪鍾虛受我則聞其直言朱絃遺音我則
戒夫專美此吾君之以樂理心也宜乎貴為天子

終南精舍月中聞磬聲詩 題中用韻六十字成

月峰禪室掩幽磬靜昏氛思入空門妙聲從覺路聞冷
滿虛壑杳、出寒雲天籟疑難辨霜鍾詎可分偶來遊法
界便欲謝人群竟夕聽真響塵心自解紛

禮部試鑿止水賦

澄虛納照三五十字以上成
依次用照三五十字以上成

水止矣靜之其徐物鑿矣久而益虛且無情於美惡又奚
議夫親踈委爵受來所期乎止善同利忘筌已悟寧患乎
至清無魚若乃迴塘月抱高岸環合凡滓湛然自沉金沙
炯其不雜同道德之以虛而受異川澤之唯污是納有匪
君子此焉明徵氣隨波息心與源澄端形赴影如木從繩
其表微也挂金鏡而當畫其索隱也隔玉壺而見冰爾其

錢遵王述古堂藏書

色必洞激光無滉漾不蒸翳鬱之氣不激潺湲之響百犬
在目千仞指掌惡每自乎中見美寔非乎外獎鑿形之始
方似以身觀身得意之間乃同求象忘象徒觀其下倒星
漢上披煙雲守其常而性將道合居其所而物以群分君
鑿之以平心臨下以簡臣鑿之而厲節在邦必聞妍媸無
形兮唯人所召物我兼遺兮水無私照庶士以之立誠至
人以之觀妙豈比夫流若激矢波如建鏡不捨晝夜爭輸
滄溟徒乖躁靜之理莫辨真偽之形者哉國固以賢為止
水鑿有餘裕群形鱗集衆象景附濫巾竊吹者十手共指
研精摭寔者千載一遇夫如是姑自攝其威儀亦何憂而
何懼

青出藍詩題中有韻限四十字成

物有無窮好藍青又出青朱研方比德白受始成形袍襲
宜從政矜垂可問經當時不採擷佳色幾飄零

奉和李相公早朝於中書侯傳點書所懷奉呈

下武相公中書鄭相公

禁門留騎吹內省正衣冠稍辨旂裳色尚聞鐘漏殘九天
爐氣暖六月玉聲寒宿霧開霞觀晨光泛露盤致君期返
朴求友得如蘭攻出同歸理言成共不刊準繩臨百度領
袖映千官卧鼓流沙靜飛航漲海安盡規酬注一作意借
賦代交藏雅韻人間滿多慙竊和難

奉和武中丞秋日臺中寄懷簡諸僚友時西蕃使

錢遵王述古堂藏書

迴奉命追和

時西蕃已下九字陸本作小字分注

聖朝思紀律憲府得忠賢指顧風行地儀刑月麗天不仁
恒自遠為政復何先虛室唯生白閑情却草玄迎霜紅葉
早過雨碧苔鮮魚樂翻秋水鳥聲隔暮烟舊遊多絕席感
物遂成篇更許窮荒谷追歌白雲前

吐蕃別館和周十一郎中揚七錄事望白山作

純精結竒狀皎一天一涯玉嶂擁清氣蓮一作峯開白花

半巖晦雲雪高頂澄煙烟霞朝昏對賓館隱映如仙家風

聞蘊孤尚終欲窮幽遐暨因行役暇偶得志所嘉明時無

外戶勝境即中華况今舅甥國誰道隔流沙

奉和張舍人閣中直夜思聞雅琴因書事通簡僚

友交朋

迢遞天上直寂寞丘中琴憶爾山水韻起予仁智心凝情
在正始超想踈煩襟涼生子夜後月照禁垣深遠風藹蘭
氣微露清桐陰方襲緇衣慶永奉南薰吟

和舍弟恭惜花絕句

時蕃中使回

去年無花看今年未看花更聞飄落盡走馬向誰家

和恭曉聽籠中山鵲

掩抑冲天意悽愴觸籠音驚曉一聞處傷春千里心

和舍弟讓咏籠中鷹

未用且求安無猜也不殘九天飛勢在六月日晴寒動觸
樊籠倦開銷肉食難主人憎惡鳥試待一呼看

錢遵王述古堂藏書

同恭夏日題尋真觀季寬中秀才書院

閑院開軒笑語闌江山併入一壺寬微風但覺杉香滿烈
日方知竹氣寒披卷最宜生白室吟詩好就步虛壇願君
此地攻文字如鍊仙家九轉丹

同舍弟恭歲暮寄晉州季六協律三十韻

古人猶悲秋况復歲暮時急景迫流念窮陰結長悲陽鳥
下西嶺月鵲驚南枝攬衣步霜砌倚仗臨水池况、若有
失情、良不怕忽聞晨起吟宛是同所思有美壯感激無
何遠悽遲摧藏變化用掩抑扶搖姿時傑豈虛出天道信
無欺巨川望沆濟寒谷待潛吹劔匣益精利玉韞一作寧
磻緇戒哉輕沽諸行矣自寵之伊我抱微尚仲氏即心期

討論自少小形影相差池比來胃中氣欲耀天下奇雲雨
沛蕭艾烟閣雙菱鞋幾年困方枘一旦迷多岐道因窮理
命以盡性知事去類絕絃時來如轉規伊呂偶然得孔墨
徒爾為早行多露悔強進觸藩羸功名豈身利仁義非吾
私萬物自生化一夫何駢馳不如任行止委分一作安所
宜勸爾休感數與余陶希夷明年郊天後慶澤歲華滋曲
水杏花雪香街青柳絲良時且豐歡樽酒聊共持閑過漆
園叟醉着五陵兒寄言所思一作思隱處不遠來相追

青海西寄竇三端公

時同事弗同窮節厲除風我徒流沙外君朝紫禁中從容
非所羨辛苦竟何功但示酬恩路浮生任轉蓬

錢遵王述古堂藏書

蕃中拘留歲餘迴至隴右先寄城中親故

蓬轉星霜改蘭陵色養違窮泉百死別絕域再生歸鏡數
成絲髮囊收技血衣酬恩有何力祗弃一毛微

吐蕃別

列一作

館卧病寄朝中親故

一作支

星漢縱橫車馬喧風搖玉佩燭花繁豈知羸卧窮荒外日
滿深山猶閉門

吐蕃列館中和日寄朝中舊僚

一作僚舊

清時令節干官會絕域窮山一病夫遙想滿堂歌笑慶幾
人緣我向西隅

及第後答潼關主人

本欲雲雨化却隨波浪翻一霑太常第十過潼關門志力

且虛弃功名誰復論主人故一作相問慙笑不能言

河中城南姚家浴後贈主人

新浴振輕衣滿堂寒月色主人有美酒况是曾相識

看渾中丞山桃花初有他客不通晚方得入因有

戲贈

朝來駐馬香街裏風度遲聞語笑聲無事閉門教日晚山

桃落盡不勝情

贈友人

南山雙喬松擢本皆千尋夕流膏露津朝被青雲陰負雪
出深澗搖風倚高岑明堂久不構雲幹何森、匠意方雕
巧時情正誇淫生材會有用天地豈無心

錢遵王述古堂藏書

道州夏日郡內北橋新亭書懷贈何元二處士

結構池梁上登臨日幾迴晴空交密葉陰岸積蒼苔爽氣
中央滿清風四面來振衣生羽翰高枕出塵埃齊物魚何
樂忘機鳥不猜閑銷奕畫畫靜勝大雲開僻遠宜孱性優
游賴廢材願為長泛梗莫作重燃灰守道窮非過先時動
是灾寄言徐孺子賓榻且徘徊

道州弘道縣王簿知縣三年頗著廉慎秩滿縣闕

中一作申使請留將赴衡州題其廳事

為理賴同力勝明非所任廢田方墾草新拓未成陰術淺
功難就人疲感易深煩君駐歸棹與慰不欺心

道州將赴衡州酬別江華毛令

此人好書破百姓
布箱頭及妄行杖

布帛精麗任土宜疲人識信每先一作相期今朝別後無他
驪雖是蒲鞭也莫施

道州夏日早訪荀參軍林園敬酬見贈

高眠日出始開門竹逕旁通到後園陶亮橫琴室有意任
棠置水竟無言松憲宿翠含風薄樓院朝花帶露繁山郡
本來車馬少更容相訪莫辭喧

道州敬酬何處士懷郡樓月夜之作

清質悠々素彩融長川迥陸合為空佳人甚近山城閉一
夜相望水鏡中

新居寺院涼夜書情呈上吕和叔郎中

峨眉山人何玄上

庾公念病宜清暑遣向僧家占上方月光似水衣裳濕

錢遵王述古堂藏書

松氣如秋枕簟涼幸以薄才當客次無因弱羽逐鸞翔
何由一示雲霄路腸斷星々兩鬢霜

道州敬酬何處士書情見贈

意氣曾傾四國豪偶來幽寺息塵勞嚴陵釣處江初滿梁
甫吟時月正高新識幾人知杞梓故園何歲長蓬蒿期君
自致青雲上不用傷心數二毛

戲贈靈澈上人

僧家亦有芳春一作壁興自是禪心無滯境君看池水湛然

時何曾一作時不受花枝影

三月一日是貞元舊節有感絕句寄竇三任黔南

盧七任雒陽

同事先皇立玉墀中和舊節又支離今朝各自看花處萬里遙知掩淚時

初發道州答崔三連州題海陽亭見寄絕句

吏中習隱好躋一作攀不擾疲人便自閑聞說殷勤海陽

事令人轉憶舜祠山

附奉陪郎中使君接上夜把火看花
鄉貢進士

城上芳園花滿枝城頭太守夜看時為報林中高舉燭

感人情思欲題詩

答段秀才

盡日看花君不來江城半夜為一作君開樓中共指南園

火紅燼隨花落碧苔

錢遵王述古堂藏書

宗禮欲往桂州苦雨因以戲贈

農人辛苦綠苗齊正愛梅天水滿堤知汝使車行意速但

令驄馬著郵泥


道州奉寄襄陽裴相公絕句

悠悠世路自浮沉豈問一作仁賢待物心最憶過時留宴

處艷歌催酒後亭深

呂和叔文集卷第一

錢遵王述古堂藏書



呂和叔文集卷第二

朝議郎使持節衛州諸軍事守衛州刺史上騎都尉賜緋魚袋呂溫
詩

吐蕃別館月夜

三五窮荒月還應照北堂迴身向暗臥不忍見圓光

望思臺作

浸潤成宮盡蒼黃弄文兵人情疑始變天性感還生宇縣
猶能洽閨門詎不平空令千載後凄愴望思名

孟冬蒲津關河亭作

息駕非窮途未濟豈迷津獨立大河上北風來吹人霜雪
自茲始草木當更新嚴冬不肅殺何以見陽春

鞏路感懷

馬嘶白日暮，劍鳴秋氣來。我心浩無際，河上空徘徊。

題梁宣帝陵二首

即雖終自剪，覆國豈為雄。假號孤城裏，何殊在甬東。
祀夏功何薄，尊周義不成。妻涼庾信賦，千載共傷情。

岳陽懷古

晨馳發荊州，落日到巴丘。方知剗剗利，可接鬼神遊。二湖
豁南寢，九派駛東流。襟帶三千里，盡在岳陽樓。憶昔鬪群
雄，此焉爭上游。吳昌屯虎旅，晉盛驚龍舟。宋齊紛禍難，梁
陳成寇讎。鐘鼓長震耀，魚龍不得休。風雲一蕭散，功業忽
如浮。今日時無事，空江滿白鷗。

錢蓮玉述古堂藏書

道州途中即事

零桂佳山水，滎陽舊自同。經途者不暇，遇境說難窮。疊嶂
青時合，澄湘漫處空。舟移明鏡裏，路入畫屏中。岩壑千家
接，松蘿一徑通。魚烟生縹緲，火吠隔葱蘢。戲鳥留餘翠，幽
花怯晚紅。光翻沙瀨日，香散橘園風。信美非吾土，分憂屬
賤躬。守愚資僻地，卹隱望年豐。且保心能靜，那求政必工。
課終如免戾，歸養洛城東。

登少陵原望秦中諸川太原王至德妙有水術因

用感歎

少陵最高處，曠望極秋空。郡山噴清源，脉散秦川中。荷鍾
成雲雨，由來非鬼功。如何盛明代，委弃傷豳風。涇灞徒駘

驛溼沮塵會同東流滔去沃野飛秋蓬大禹平水土吾
人得其宗發機迴地勢運思與天通早欲獻奇策豐財叙
西戎豈知年三十未識大明宮卷爾出岫雲追吾入冥鴻
無為學驚俗狂醉哭途窮

奉勅祭南嶽十四韻

皇家禮赤帝謬獲司封域致齋紫蓋下宿設祝融側鳴澗
警宵寐清猿遙時刻燥潔事風興簪佩思盡飾危壇象岳
趾秘殿翹翬翼登拜不遑顧酌獻皆累息贊導儀匪繁祝
史詞甚直忽覺心魄悸如有精靈逼漠漠雲氣生森森杉
栢黑風吹虛簫韻露洗寒玉色寂寞有至公馨香在明德
禮成謝邑吏駕言歸郡職憇桑訪蚕事遵疇課農力祈願

錢遵王述古堂藏書

風雨時迴首瞻南極

經河源軍漢村作

行忽到舊河源城外千家作漢村樵採未侵征虜墓耕
耘猶就破羗屯金湯天險長全設伏臘華風亦暗存甕駐
單車空下淚有心無力復何言

題河州赤岸村

左南橋上見河州遺老相依赤岸頭
匣塞歌鐘受恩者誰
伶被髮哭東流

題陽水城

忠驅義感即風雷誰道南方乏武才
天下起兵誅董卓長
沙子弟最先來

晉王龍驤墓

虎旗龍艦順長一作風坐引全吳入掌中孫皓一一作兒

何足取便令千載笑爭功

題石勒城三首

長驅到處積人頭大旆連營壓上游建業烏樓何足問慨

然歸去王中州

天生傑異固難馴應變推枯若有神夷甫自能疑倚笑忍

將虛誕誤時一作人

劉郎浦口號

吳蜀成婚此水濤明珠步障握黃金誰將一女輕天下欲

換劉郎島峙心

錢遵王述古堂藏書

自江華之衡陽途中絕句

孤棹遲、帳有違公湘數日返清輝人生隨分為憂喜迴

鴈峰南是北歸

吐蕃列館送楊七錄事先歸絕句

愁雲重拂地飛雪亂迷程莫慮前山暗歸人眼自明

奉送范司空赴朔方得遊字

築壇登上將膝席委前籌虜虜南侵跡朝分北顧憂抗旌

迴廣莫撫劍勦旄頭坐見黃雲暮行看白草秋山橫舊秦

塞河繞古靈州善守知兵事唯應獵駭遊

送文暢上人東遊

隨緣聊振錫高步出東城水止無怕地雲行不計程到時

為彼岸過處即前生今日臨歧別吾徒自有情

喜儉北至送宗禮南行

洞庭舟始泊桂江帆又開魂從會處斷愁向笑中來敬悅
看殘景殷勤祝此枉衡陽刷羽待成取一行迴

送段九秀才歸澧州

湘南孤白芷幽託在清淥豈有一作馨香發空勞知處深
推賢路已闕取乏力弗任慙我一作一言分負君千里心寸義
薄聯組片誠敵兼金方期踐冰雪無使弱思侵

衡州送李十一兵曹赴浙東

慷慨視別劍淒清泛離琴前程楚塞斷此恨洞庭深文字
久已廢循良非所任期君碧雲上千里一揚音

錢遵王述古堂藏書

臨洮送袁七書記歸朝

時袁生作僧善人呼為袁師

憶年十五在江湄聞說平涼且半疑豈料殷勤洮水上却
將家信託袁師

江陵醉中留別坐客

尋常縱恣倚青春不契心期便不親今日煙波九疑去相
逢盡是眼中人

道州酬送何山人之容州

匣有青萍笥有書何門不可曳長裾應須定取真知者遣
對明君說子虛

道州送戴簡處士往賀州謁楊侍郎丈

羸馬孤僮鳥道微三千客散獨南歸山公念舊偏知我今

日因君淚滿衣

春日遊郭駙馬大安亭子

戚里容閑客山泉若化成寄遊芳徑好借賞彩船輕春至
花常滿年多水更清此中如傳舍但自立功名

楚州追制後舍弟直長安縣失囚花下共飲

天子收都印東兆責獄囚狂兒與狂弟不解對花愁

衡州歲前遊合江亭見山櫻葉未折因賦含彩悵

驚春

山櫻先春發紅蕊滿霜枝幽處竟誰見芳心空自知似羞
朝日照疑畏暖風吹欲問含彩意恐驚輕薄兒

衡州登樓望南館臨水花呈房戴段李諸公

錢遵王述古堂藏書

天桃臨芳塘暮色堪愁思託根豈求潤照影非自媚骨挂
青柳絲零落綠錢地佳期竟何許時有幽禽至

合江亭樓前多高竹不見遠岸花客命剪之感而

成詠

吉凶豈前卜人事何翻覆綠者數日花却剪凌霜竹常言
契君操今乃好衆目自古病當門誰言出幽獨

道州春遊歐陽家林亭

道州城北歐陽家去郭一里占烟霞主人雖朴甚有思解
留滿地紅桃花桃花成泥不須掃明朝更訪桃源老政成
興足則一作告歸門前便是家山道

衡州早春偶遊黃溪口號

偶尋黃溪日欲沒早梅未盡山櫻發無事江城閉此身不
得坐待花間月

衡州夜後把火看花留客絕句

紅芳暗落碧池頭把火遙看且少留半夜忽然風更起明
朝不復上南樓

夜半把火看南園花招李十一兵曹不至呈座上

諸公

天桃紅燭正相鮮傲吏閑齋困獨眠應是夢中飛作蝶悠
揚祇在此花前

順宗至德大聖大安孝皇帝挽詞三首

遐視輕神寶傳歸厲聖猷竟功終有待文德本無憂坐受

錢遵王述古堂藏書

朝汾水行看告岱丘那知禹成後龍馭弗淹留
監撫垂三紀聲徽洽萬方禮因馳道著明自懇田彰滋漸
承鴻業從容守太康更留園寢詔恭聽有餘芳
早秋同軌至晨旆露華滋挽度千夫咽笳凝六馬遲劔悲
長閑日衣望出遊時風起西陵樹淒涼滿孝思

詠蜀客蜀琴枕

可憐他山石幾歲潛貞堅推遷強為用雕斲傷自然文會
巴江浪色起晴城烟更聞餘玉聲時入朱絲絃

河南府試贖帖賦得卿飲酒詩

酌言修舊典刈楚始登堂百拜賓儀盡三終樂奏長想同
鷲出谷看似雁成行禮罷知何適隨雲入帝鄉

賦得失群鶴

杳、冲天鶴，風排勢，鬣遠有心長。自負無伴，可相依，萬里
寧辭遠。三山詎憶歸，但令毛羽在何處，不翻飛。

道州南樓換柱

洪災起，無朕有見非。前知蟻入不足郵，柱傾何可追。良工
操斤斧，沉吟方在斯。杯事朽廢曷昔新，宏規

道州北池放鵝

我非好鵝癖，爾反鳴雁姿。安得免滄島，澹然遊清池。見生
不忍食，深情固在斯。能自遠飛去，無念稻梁為。

迴風有懷絕句

銀宮翠島烟霏，一作珠樹玲瓏朝日暉神仙望見不得

錢遵王述古堂藏書

到却逐迴風何處歸

蕃中答退渾詞

退渾部落盡在而為吐蕃所鞭撻有譯者訴情於予因而答之

退渾兒退渾兒朔風長在氣何衰萬群鉄馬從奴虜強弱
由人莫歎時退渾兒退渾兒水銷青海草如然明堂天子
朝萬國神息一作龍駒將與誰

上官昭容書樓歌

貞元十四年友人崔仁亮于東都買得神記一卷有昭容列

名書錄感歎而作是歌

漢家媿好唐昭容工詩能賦千載同自言才藝是天真不
服丈夫勝婦人歌闌舞罷閑無事縱恣優游弄文字玉樓
寶架中天居絨竒秘異萬卷餘水精編秩綠鈿軸雲母擣
帟黃金書風飄花露清旭時綺窓高挂紅銷帷香囊盛烟

綉結絡翠羽拂案青琉璃吟披綉卷紛一作無已皎淵
機破研理詞縈彩翰紫鷺迴思耿寥天碧雲起碧雲起心
悠哉境深轉若坐自摧金梯珠履聲一斷瑤階日夜生青
苔青苔秘空閣曾比群玉山神仙杳何許遺逸滿人間君
不見洛陽南市賣書肆有人買得研神記紙上香多蠹不
成昭容題處猶分明令人惆悵難為情

聞砧有感

千門儼雲端此地富羅紈秋月三五夜砧聲滿長安幽人
感中懷淨聽淚汎瀾所恨搥衣者不知天下寒

早覺有懷

東方殊未明空蟲正飛先覺忽先起衣裳顛倒時嚴冬

錢遵王述古堂藏書

寒漏長此夜如何其不用思秉燭扶桑有清暉

冬日病中即事

墻下長安道鷺塵咫尺間久牽身外役暫得病中間昔喜
朝陽滿心恰莫鳥還吾在何處南有白雲山

病中自戶部員外轉司封

羸卧承新命優容獲所安遣兒寧賀客無力拂塵冠偃仰
晴軒暖支離曉鏡寒那堪報恩去感激對衰蘭

久病初朝衢中即事

沉疴曠十旬還過直城闈老馬猶知路羸童欲怕人又隳
三徑計更強百年身許國將何力空生衣上塵

道中城北樓觀李花

夜疑關山雪曉似沙場雪曾使西域來幽情望超越將念
浩無際欲言忘所說豈是花感人自怜抱孤節

道中秋夜南樓卽事

誰念獨坐愁日莫此南樓雲去聲祠開月明瀟水流猿聲
何處曉楓葉滿山秋不分匣中鏡少年空白頭

道州觀野火

南風吹烈火焰燒楚澤陽景當晝暉陰天半夜赤過處
若簍掃來時如電激豈復辨蕭蘭焉能分玉石蟲蛇盡爍
爛虎兕亦奔迫積穢亦蕩除和氣始融液堯時既敬授禹
稼斯肇跡遍生合穎禾大秀兩岐麥家有京坻詠人無溝
壑戚乃悟焚如功來歲終受益

錢遵王述古堂藏書

衡州蚤春二首

碧水何逶迤東風吹沙草煙波千萬曲不辨嵩陽道
病肺不飲酒傷心不看花惟驚望鄉處猶自隔長沙

郡內書懷寄劉連州賈夔州

朱邑何為者桐鄉有古祠我心常所慕二郡老人知

偶然作二首

栖、復汲、忽覺年四十今朝滿衣淚不是傷春泣
中夜兀然坐無言空泔淒丈夫志氣事兒女安得知

古興

越歐百鍊時楚卞三泣地二寶無人識千齡皆弃置空巖
起白虹古獄生紫氣安得命世客直來開與閉劔任荆鍾

看玉從投火試必能絕疑惑然後論奇異

風詠

微風生青蘋習、出金塘輕搖深林翠靜獵幽徑芳掩抑
時未來鴻毛亦無傷一朝乘嚴氣萬里號清霜北走摧鄧
林東去落扶桑掃却垂天雲澄清無私光悠然返空寂晏
海通舟航

道州感興

當代知文字先皇記姓名七年天下立萬里海西行苦節
終誰辨勞生竟自輕今朝流落處瀟水遶孤城

春日與李六舍弟聯句

始見花滿枝又看花滿地景且持增氣酒莫滴傷心淚温

錢遵王述古堂藏書

深誠長鬱結芳辰自妍媚恭笑歌聊永日誰知此時意景

鏡中歎白髮

年過潘岳纔三歲還見星、兩鬢中縱使他時能早達定
知不作黑頭公

友人邀聽歌有感

文章拋盡愛功名三十無成白髮生孤負壯心羞欲死勞
君貴買斷腸聲

貞元十四年早甚見權門移芍藥花

綠原青壘漸成塵汲井開園日、新四月帶花移芍藥不
知憂國是何人

冬夜即事

百憂攢心起復卧夜長耿、不可過風吹雪枝似花落月
照水文如鏡破

道州郡齋卧疾寄東館諸賢

東池送客醉年華聞道風流勝習家獨臥郡齋寥落意隔
簾微雨濕梨花

讀小弟詩有感因口號以示之

憶君未冠賞年華二十年間在咄嗟今來羨汝看花歲似
汝追思昨日花

讀勾踐傳

丈夫可殺不可羞如何送我海西頭更生更聚終須報二
十年間死却休

錢遵王述古堂藏書

道州有歎


列館月犁牛冰河金山雪道州月霜樹子規啼是血壯心
感此孤劍鳴沉火在灰珠未滅

風歎

青海風飛沙射面隨驚蓬洞庭風危檣欲折身若空西馳
南走有何事會須一決百年中

呂和叔集卷第二

錢遵王述古堂藏書



呂和叔文集卷第三

朝議郎使持節衡州諸軍事守衡州刺史上騎都尉 賜緋魚袋呂溫
書序

與族兄臯請學春秋書

儒風不振久矣某生於百代之下不顧昧劣凜然有志翹
企聖域莫知明從如仰高山臨大川未獲梯航而欲濟乎
深而臻乎極也凡學之道嚴師為難師資道喪八百年矣
自鳳鳥不至麒麟遇害血流戰國火發暴秦先王之道幾
墮於地賴漢氏勃焉而拯之轆槽柏揚煨燼披雲霧指日
月夫子文章滅而後耀與火德俱朗者四百餘年當時大
教中興去聖未遠學士非師說不敢輒言鴻儒碩生樂以

善誘弘道雖為公卿教授不徇其徒大者至千餘人小者亦數百人或升乎堂或入於室洋、濟、有古風也夫學者豈徒受章句而已蓋必求所以化人日、新又日新以至乎終身夫教者豈徒博文字而已蓋以本之以忠孝申之以禮義敦之以信讓激之以廉耻過則匡之失則更之如切如磋如琢如磨以至乎無瑕故無漢多名臣諫諍之風同乎三代蓋由其身受師保之教誨朋友之箴誡既知已之損益不忍觀人之成敗也魏晉之後其風大壞學者皆以不師為天縱獨學為生知譯疏翻音執疑護失率乃私意攻乎異端以風誦章句為精以穿鑿文字為奧至於聖賢之微旨教化之大本人倫之紀律王道之根源則蕩

錢遵王述古堂藏書

然莫知所措矣其先進者亦以教授為鄙公卿大夫耻為人師至使鄉校之老人呼以先生則勃然動色痛乎風俗之移人也如是是以今之君子事君者不諫諍與人交者無切磋蓋由其身不受師保之教誨朋友之箴誡既不知已之損益惡肯顧人之成敗乎而今而後乃知不師不友之人不可與為政而論交矣且不師者廢學之漸也恐數百年後又不及於今日則我先師之道其墮於深泉是用終日不食終夜不寢馳古今而慷慨抱墳籍而太息吾兄吾兄亦曾以是為念乎小子狂簡實有微志蘊童蒙求我之願立朝聞夕死之誓所與者不惟鴻碩之老博洽之士與我同志者則為吾師與兄略言其志也其所貴乎道者

六其詩書禮樂大易春秋歟人皆知之鄙尚或異所曰禮者非酌獻酬酢之數周旋禘襲之容也必可以經乾坤運陰陽管人情措天下者某願學焉所曰樂者非綴兆屈伸之度鏗鐸鼓舞之節也必可以厚風俗仁鬼神熙元精茂萬物者某願學焉所曰易者非揲著演教之妙畫卦繫繇之能也必可以正性命觀化元貫衆妙貞夫一者某願學焉所曰書者非古今文字之舛大小章句之異也必可以辨帝王稽道德補大政建皇極者某願學焉所曰詩者非山川風土之狀草木鳥獸之名也必可以警暴虐刺淫昏全君親盡忠孝者某願學焉所曰春秋者非戰爭攻伐之事聘享盟會之儀也必可以尊天子討諸侯正華夷繩賊

錢遵王述古堂藏書

亂者某願學焉此於非聖人所論不與於君臣父子之際雖欲博聞不敢學矣吾兄達者也可不曰然乎嘗閱雅論深於春秋其間所得實曰淵正竊不自揣願以春秋三傳執樞衣之禮於左右童蒙求我兄得辭乎朝聞夕死某可逆乎無以流俗所輕而忽賢聖之所重也其餘五經當今孰可為某師者幸詳鄙志而與擇焉

上族叔齊河南書

大尹叔父閣下某聞水官脩而龍至官失其方物及坻伏以章：而言則先進為後進之官也亦宜正褒貶別雅鄭宣六義合三變以修其官使後進之徒靡然向風皦然知方能者勸不能者止於是乎文章之可見也如掃除氛昏

澄定波濤穹天清而日月耀滄海晏而蓬壺出今夫先進
之廢官久矣文猶龍也其可見乎伏惟叔父蘊持進之明
哀雅頌之缺常欲以三代制度訓斯文前罷鎮南服入侍
東掖詞林聳仰如日登觀莫不結轍連駟懷編捧軸差池
道路奔走光塵人人自以為齊公之遇矣及乎昌言金馬
高議承明懸大雅之衡以權後進則乃以小子為稱首達
勾萌而茂以柯葉翌雅驚而使之頡頏先達改觀同類駭
聽響動朝端聲馳轂下循顧反覆誠非所堪竊料叔父之
意豈不欲使濫音竊吹者聞士會而西逃秦境敦行守正
者望郭隗而北首燕路夫是則小子敢賀天下文章廢而
復興不敢自當其過也然大匠雖哲不能化擁腫之材大

錢遵王述古堂藏書

風雖壯不能起凝滯之物曩充鄉賦薦辱公議昨詔賢良
猥塵清舉叔父以唱高寡和小子以名浮易喪聞闕埋鬱
卒用無成取笑薄徒眇羞左右雖失鵠而知反終胡顏而
敢安愧懼慚惶夙夜若厲叔父蹈中庸之德遭兼濟之運
荷深知於明主懸大望於蒼生一朝秉唐之鈞埏埴萬物
而高明不奪於獨見酬分克彰於日新茲前途未敢自
料豈遽以一茅為得喪哉由是思之勃焉增氣遂欲攝迹
聲利潛心道藝窮六籍之統紀畫王變之形容使學通天
人文正雅俗然後抗衡當代為叔父之榮雖知其難志不
可奪謹獻近文七首徒跂聖人之域未臻作者之方姑務
自強式酬與進伏願特污省覽光賜教誨指以遠蹤責以

大成惠何加焉非敢望也

代李侍郎與山南嚴僕射書

僕射稟天全才受國重寄控全蜀咽喉之地當狂寇奔侮
之衝處瘠土而其財甚豐訓羸師而其武可畏少分麾下
潛運掌中再開劍閣之高維獻鹽亭之捷應接制使先假
地征犄角王師且為鄉導崩叛人之跡釋梓州之圍勞實
倍多功無與讓聖上神武睿斷注意西南一校之善否必
知一夫之勞逸必察况閣下啟彰朝論事布人謹精神貫
於神祇茂伐懸於日月豈復聽簿書之巧詆笙簧之濫音
來示所虞無足介意某以寡薄謬膺重任舉關國計動屬
軍期夙夜憂慙未知所濟過蒙稱獎愧惕良深唯託方岳

錢遵王述古堂藏書

至公共守王度物估小事固無二三共計遵行亦如受賜
佩荷之至無喻下情某再拜

代李侍郎與宣武韓司空書

某以非才謬當重任事關國計動限軍期撫事知難夙夜
憂積蓋以運路壅滯私鹽撓法方非苟司所及唯託方鎮
至公伏惟司空文武全才勲德茂著朝廷毗倚中外共瞻
勤王則知無不為憂國則言皆可復今春過日獲拜旌麾
眷私之餘已及此事蒙許同志立法叶力徇公對揚之初
便具奏聞所以遣裴郎中往申朝旨議立規模悉令咨託
大賢非敢專行鄙見昨得巡院狀報伏承司空德量旁通
忠誠感發急公家之病同職司之憂鹽法隄防已行文牒

斗門開塞許有商量率先諸侯首贊王度義形九牧忠勳
三軍意開而遠近承風言發而神明知感况某奉職之分
承眷之深受賜懷仁豈同常等銘戴所至無喻下情

代李侍郎與徐州張尚書書

奉別紙示諭春待殊異規畧端明究忠義之苦言暢經通
之雅旨皆足以感動朝野光映古今十字之貴可懸於千
金終身佩之何啻於主稷甚善甚善伏以尚書才膺間出
識蘊生知地承勲德行在詩禮自家達國移孝為忠受任
先朝克荷崇構控喉襟之地成節制之師勳必勤王志皆
憂國忠實彰於行事義聲感于旁隣布在人誦溢於時論
鳴鶴有和鼓鐘必聞聖上神武聰明惟新履燾勵精戎事

錢遵王述古堂藏書

注意蕃隅方仄陋以旁求况勲賢之自著何患乎誠不上
達道不大光宣太阿之利用窮彘鼎之盛烈者乎某以寡
薄謬膺重任成賦之重撫事知慙彼欲盡愚陳鄙見策
朽磨鈍庶效涓埃竭誠指軀少酬恩遇知我者寡同志實
難頃在江西過辱厚意常懷慕仰頗歷歲時昨者以私塩
干禁漸耗公利汴州滯運屢稽軍期忝當職司每積憂負
輒率誠懇粗申條例網羅盜糴節宣通渠實託衆賢敢專
獨見果蒙弘至公之量推急病之心率先侯伯首贊王度
許以別設方略大為隄防究絕姦源通利國漕神之聽之
言可復於天地有始有卒事必立於邦家佇觀莫大之功
以成不朽之美諸侯師表天子腹心千載一時誠無與讓

某奉職之分受賜孔多孝寸誠夙夜欣企幸甚幸甚徐
僚宜並在使至口述伏惟昭悉

代辛將軍與晉閔劉尚書書

某性質鄙昧智能無取承籍門緒早蒙驅策盡瘁軍府備
嘗艱難儉一作徒竭犬馬之勞誰濟弓裘之美家構未克國
恩未酬而謬典禁司職惟侍衛良時自晚宿志莫伸憤血
猶剛憂髮先白加以稟性寡合知音實難甘心此生長鳴
靡託豈料尚書推弘深之量啓特達之心愛念不遺眷知
益重昨者四牡來觀萬乘虛心旁求將帥之臣佇請至公
之鑒然則蕭何之稱必在韓信孝文有問宜薦雲中而丹
墀對揚首及庸瑣敷陳本末獎飾逾涯達其忠義之誠許

錢遵王述古堂藏書

其遠大之致雖躬論志業自瀝肺肝纖悉周詳豈能及此
遂使鬱堙之志允達於宸聰樗朽之材式孚於帝念言發
九天之上聲聞四海之中行得舟航坐生羽翼雖管鮑在
齊載深知我之感王貢仕漢有切彈冠之善方諸今日未
定為喻不圖知己之至於斯義激血誠恩纏骨髓每一念
至不覺涕流頰首糜軀豈能報德難當竭誠礪節服義懷
仁奉以周旋君之造次青松得地方見於歲寒皦日在天
願聽其心誓生死幸甚幸甚厲有負薪之疾未申拜賜之
禮瞻荷之至感懼兼深奉卜下情未知所措稍任行李即
真趨謁伏惟照察云云

代竇中丞與襄陽于相公書

其經術無取丘園自屏所期全拙豈敢近名二十五丈況
愛博容不遺孤陋申以通家之好遇以國士之分禮一作
慙入室契辱忘年假賜吹噓謬假鱗翼遂得價重江左名
聞天朝起家拾遺再命柱史時丁變故命偶屯難孤鱗方
困於蹄涔窮鳥再歸於仁德果蒙奏領列郡擢倅三軍不
汝疵瑕見容於歲月同我休戚每形乎話言身計皆奉良
規家事悉資全力然後表達宸聽推致周行南宮劇曹踐
不終歲憲府雄秩授于常倫內顧庸虛敢云自致魏賢子
夏宣尼之道彌尊漢用淮陰相國之言始重徒以才負知
已名懸古人致遠之效莫彰貽羞之責斯及敢不砥礪微
分激昂前途以明君今日之恩資大賢積時之譽庶乎有

錢遵王述古堂藏書

立以谷所知豈敢以尸素為榮而負乎生之論伏惟鑒察
郡榻諸生戎旃故吏往獎恩重生成感深瞻望門闥未獲
拜謝銘戴兢惕莫知所裁奉下情紙墨難具某再拜

地志圖序

廣陵李該博達之士也學無不通尤好地理惠其書多門
歷世寔廣文詞浩蕩學者疲老由是以獨見之明法先聖
之制黜諸子之傳一作序一作記述仲尼之職方會源流考同異
務該暢從體要倬然勒成一家之說猶懼其與未足以昭
啟後生乃裂素為方儀據書而畫隨方而以區別擬形容
之訓解命之曰地志圖觀其粉散百川黛凝群山元氣剖
判戈乎筆端任土之毛有生之類大鈞變化不出其意然

後列以城郭羅乎陬落內自五侯九伯外自要荒蠻貊禹
跡之所窮漢驛之所通五色相宣萬邦錯峙毫釐之差而
下正乎封略方寸之界而上當乎分野乾象坤勢炳焉可
觀與夫聚米擬其端倪畫地陳乎梗槩固不可同年而語
詳略也每虛室燕居薄帷晴褰普天之下盡在屋壁戶納
四海窻籠八極名山大川隨顧奔走殊方絕域舉意而到
高視華裔坐橫古今觀帝王之彊理見宇宙之寥廓出遊
入幽曾不崇朝與夫役躬神于歲月窮轍跡於區外又不
可並軌而論勞逸也且夫刪百代之弊綜群言之首繁而
不亂疎而不漏才識以潤之丹青以炳之使嗜學之徒未
披文而見義不由戶而覩與斯訓導之明也窮地而述舉

錢遵王述古堂藏書

世而載事極鴻纖理通曖昧混一家之文軌張大國之襟
帶覈人物之虛實揔山川之要會表皇威之有截明王道
之無外斯乃功用之大也見蒼梧塗山則思舜禹恤民之
艱覩窮荒大漠則悟秦漢勞師之弊覽齊疆晉壤則想桓
文勤王之霸觀洞庭荆門則知苗蜀恃險之敗王者于是
明乎得失諸侯于是鑒乎興替斯又懲勸之遠也然則本
之所以廣學流申之足以資鴻業垂之可以示後世豈徒
由近觀遠以智自樂為室中之一物哉而時無知音道不
虛行舉地成圖闡天無路此志士儒林所以為之賴息也
某又從君遊辱命叙述庶明作者之意俾好事君子知其
所以然

送友人遊蜀序

始吾挹至源之貌若隴底積雪聳寒木于雲谿次吾覽至源之文若驪龍相追弄明月于泉窟末吾聽至源之論若泰山欲雨倒雲氣于滄溟如其貌可以振肅周行如其文可以光潤石渠如其論可以感動宣室而淪蕩江海垂二十年則不知天所以生之之意貞元甲乙歲以親故勸勉來遊京師時然後言無辨以動衆樂然後笑無歡以接物義然後取無食以寧居慨然悔之決策長往因登紫閣峯而指曰西南青冥色連岷峨吾行何歸山盡則住翌日告別于友人太原王玄運顧謂予曰高雲出岫無時雨之會與風悠揚轉遠而散若至源者其猶雲耶盍亦贈之序予

錢遵王述古堂藏書

和女

送琴客槌蕙濟東歸便道謁王魏州序

東海槌蕙濟年十三從淮南大軍有奇童之稱歲既冠歷泗上劇職振能吏之聲而尚氣節重言諾臨財廉見義勇蘊崇具美發以雅琴琅琅然若佩玉之有衝牙也貞元丁丑歲觀藝京師冲字罕窺正聲寡聽道不苟合浩然東歸水流無心遇用則止弘農守御史中丞王公得子最深且東諸侯之望也儻羽翼吾道鏗鏘爾音飛而鳴之一日千里則何公門不可曳長裾乎大丈夫威波未始有極生死且不足問况能離憂乎白露降秋雲起仰見太華壯心勃興若不激微變商是孤慷慨吾季恭也詩有逸氣盍韻鍾

律播於絲桐

聯句詩序

河東柳茂直與余有潘陽之睦且道義相得也余兄弟志守拙默不交當世晨昏之外靖專一室顧我者唯茂直而已以為切磋蓋常事討論有宴息道志氣徒然起憤議時事余欲無言其或晴天曠景浩蕩多思永夜高月耿々不寐或風露初曉恍若有得或煙雨如晦緬懷所思則何以節宣恠舒暢達情性其有易於詩乎乃因翰墨之餘琴酒之暇屬物命篇聯珠迭唱一作審韻律同聲則應研情比象造境皆會亦猶衆壑合注需為大川群山出雲混成一氣即宣五色微闡六義雖小道必有可觀其在茲矣茂

錢遵王述古堂藏書

直命余序述存以編簡俾後之觀者知吾黨所立之濫觴

送薛大信歸臨晉序

先師曰益者三友吾能得之豈惟直諒多聞而已可以旁魄天人談堯舜之道則有吾族兕臯可以本情性語顏夷之行則有太原王師簡可以發揚古訓論三代之文則有河東薛大信此三君子或道以樂我或行以約我或文以博我遭時則有光遜世則無悶其為益也不亦大乎大信與予最舊始以孝悌餘力皆學于廣陵之震巖寺雲卷其身討論數歲當見大信述作必振乎六經取禮之簡要詩之比興書之典刑春秋之褒貶大易之變化錯落混合峭嶸特立不離聖域而逸軌絕塵不易雅制而瓌姿萬變有

若雲起日觀盡成丹霞峰岬靈掌無非峻勢皆天光朗映
秀氣孤拔豈藻飾而削成者哉聖上方欲觀人之文潤色
洪業秉筆若如三光得天每賀大信有其時矣無何予被
鄉曲之譽賦于闕下以文非時體行失俗譽再為有司所
黜此時大信亦與計偕知機全高匣刃不試昔趙然鳴犢
仲尼臨河而折予之見黜子亦遠巡事雖不同其所感一
也歲八月以姑妣之戀告予子歸予思古人有處有贈乃
語之曰吾聞賢者志其大者文為道之飾道為文之本專
其飾則道喪返其本而文存且使不存又何傷矣彼邦是
帝堯之遺俗唐叔之所理必有忠信如君者焉問安之下
可與之處琢磨仁義浸潤道德考皇王治亂之迹求聖哲

錢遵王述古堂藏書

行藏之旨達可以濟乎天下窮可以據其光明無為矻矻
筆硯間也行矣大信苟非同志勿失予言

道州律令要錄序

某頃累忝官尚書省御史臺偏觀諸曹多書令式格律於
其屋壁苟非以宦遊為情而奉其職者皆得日夕省覽卧
起出入目存心悟章、然如貫珠如循環吏無以欺臨事
不惑決繁滯舉狂直而叶于大中中人已上固可循致吾
不知其誰首之何前賢處心郵事之同也若州縣者卑而
近於人遠而切於得失動有懸人命關風俗而墮者委成
於一吏望空而暑動者檢閱山積神情氣沮卒無所歸政
令之弊不亦宜乎此州法吏何洛庭良士也與撮其要講

其義書于廳事之左某不深於法猶慮未盡後來君子其
究成之此長人者之所急

元和五年五月二十七日

裴氏海昏集序

海昏集者有唐文行之臣故度支郎中專判度支事贈尚
書左僕射正平節公裴氏諱某字某考地毓德會友輔仁
氣志如神英華發外之所由作也初公違河洛之難以其
族行攀大別浮彭蠡望洞庭迴翔于巨溟流盼于海昏海
昏有歐山之奇脩江之清陽溪之邃陽泉之靈竹洞花塢
仙壇僧舍雞犬鍾梵相聞於清嵐白雲中數百里不絕時
也俗以遠未擾地以偏而寧開元之遺老盡在猶歌詠乎
升平公悠然樂之遂與我外王父故屯田郎中集賢殿學

錢遵王述古堂藏書

士河東柳公諱某叔祖故相國宜城伯諱渾洎故太常卿
蘭陵蕭公定故秘書少監范陽盧公虛舟故左庶子隴西
李公勛為塵外之交極心期之賞唯故給事中汝南袁公
高故將作監河南元公旦以後進預焉江左搢紳諸生望
之如神仙邈不可及每賦一泉題一石毫墨未乾傳詠已
遍其為物情所注慕如此無何朝廷命公盈虛東南漕引
吳楚中原百萬之衆仰食於公人不堪其煩我若無事往
往佩鰲印擁大蓋枉道而過舊山林壑之間琴詩不廢心
計屈指而軍餼瞻其大雅之全材者歟於戲太尉侍中勤
勞王家惠于生人至公再世又以盛德屈於年運慶如壘
川其決必大由是焜耀之烈重集于我郇公郇公始以大

孝聞中以大用顯次以大忠升藩屏三朝出入二揆述先
職而堂邦賦修祖德而殘台衡理荆之政篆在樂石定蜀
之武藏在冊府漢南之化方洽于人謠加以優游藝文悖
悅經術身被華衮門全素風不畏強禦不侮孤賤父要皆
當代長者推轂必一時雋傑海內士大夫和鱗羽之歸龍
鷲君子曰憲公忠憲公之勲德節公之雅道為不忘矣邠
公以霜露之感泣編遺文思所以垂諸不朽以為節公消
息出處之道始于海昏遂于正集外別次當時唱和遊覽
錢勞之作凡九十六篇勒為海昏集上下卷不遠三千里
授簡于小生俾酌歸趣而為序引其常備中臺之屬實辱
至公之遇命以哀敬不敢文為始陳古義用贊風訓昔者

錢遵王述古堂藏書

三代陳詩以觀民風信詐淫義躁靜柔剛於是乎取之喜
怒哀樂吉凶存亡於是乎觀之兆於此必應於彼成乎終
必見乎始詩不可以為偽魏公子為南皮之遊以浮華相
高故其詩傲蕩驕志勝而專勒而不安晉名士為金谷之
醪以邪侈相扇故其詩濫溺淫志治而緩往而不返正平
公為海昏之會以禮義相誨故其詩恬淡退志莊直立志
退以獨全其道立以兼濟於時立而不矜退而不悲適而
不放樂而不荒親而不比數而不曠如切如磋婉而有直
體曰比曰興近而有深致仁者見之適世而無憂智者見
之愛身而有待曖乎若冬陽之煦油乎若春澤之侵其誘
人也易其感人也深卒不知其所以然也夫如是則觀南

皮之詩應劉焉得不天魏祚焉得不短觀金谷之詩潘石
焉得不誅晉室焉得不亂觀海昏之詩裴氏焉得不興我
唐焉得不理詩之時義其大矣哉天人國家之際其至矣
哉為節公邨公之子孫者其無忘哉元和五年五月七日
朝議郎使持節道州諸軍事守道州刺史上騎都尉賜緋
魚袋東平呂某謹述

呂和叔文集卷第三

錢遵王述古堂藏書

呂和叔文集卷第四

朝議郎使持節衡州諸軍事守衡州刺史上騎都尉 賜緋魚袋呂温
表

代論伐劔南更發兵表 元和元年

臣某言臣伏見某月日詔旨更發太原鳳翔及神策諸鎮
兵赴劔南東川者陛下睿算無遺神武必斷與人除害順
天行誅奮如霆之威乘破竹之勢期於又逸無憚一勞大
正國經永清時禔百土盛事千古英聲天下幸甚天下幸
甚然或時事之可否兵家之利病道途之險易將帥之宜
稱不可不深圖遠計原始要終狂夫有可擇之言愚者有
一得之慮管窺所至願效微忠臣竊以古今用兵皆在將

勇師和政齊計勝不必多兵廣衆然後成功今高崇文等諸將所統已約一萬五千餘人以整擊亂以順討逆授之廟算假之天威馘醜摧堯需有餘力若更多徵征鎮廣合師徒巨竊計之其患有五一則高崇文素非大將拔自偏鎮忠勇雖著威聲未洽本兵既少兼統則多將皆權隸士非素撫雖是統師勢同烏合居常則猶可脅制臨敵則何以指揮非唯崇文才分有限此亦自古兵家所難臣不敢廣引載籍上煩聖聽請直以近事明之哥舒翰潼關之守郭子儀相州之圍韓全義澗水之役皆以兵多將雜而致敗衄許叔冀之保靈昌李光弼之全河陽李晟之拔復京邑皆以兵少將一而建大功成敗昭然而布在人口二則

錢遵王述古堂藏書

貞元已來天下無事四方節將人各懷安陛下履燾惟新理先清靜今以西南小醜久積天誅自春徂冬徵發已廣見在兵力破賊有餘若更務濟師屢聞動衆山劍深阻暑隲為沴北人南役誰不憚行去土離家動生愁怨往年涇州叛卒職此之由事繫安危不可不察三則吐蕃盟好未定窺伺在心間諜往來急於郵傳又必持兩端之計與劉闢交通若開發兵西南多取邊鎮秋風即至虜馬已肥冒陳乘虛必有侵軼事出萬一悔何可追四則劉闢窮寇保險逃死雖禍淫助順天道甚明而兵凶戰危人事難必脫貌武之師少不如意蜂蟻猶聚假息旬時攻守之間動須應援固當蓄鋒養銳以逸待勞今便悉兵後將何繼五則

劔川饒瘠居人食且不充蜀路險難餉運無由多致今屯
兵日費何啻萬金數州米貴糴且將盡千里飛輓所濟幾
何若更加兵實難供贍一夫設有菜色三軍無復關心幸
可少以成功何必多而成患今大原及神策等軍已上道
者其數頗多足辦戎事其鳳翔等鎮未發之兵伏乞聖恩
且勸權停續後事宜以議行止臣謬膺重任過蒙恩遇輒
率狂瞽輕贖宸嚴苟利國家甘心鼎鑊無任兢惶懇迫之
至謹奉表陳奏以聞

代李侍即賀德政表

臣某言臣聞上天垂象當分野者先知元后用心奉職司
者方見是以堯稱光被四岳得於疇咨舜號文明九官稟

錢遵王述古堂藏書

於分命豈非隨方表忠因事立言陳力自參於化源造膝
難迷於日用伏惟皇帝陛下蒼圖濬發玄德廣運恢纂鴻
緒允升大猷振十聖之遺休復百王之墜典至如崇陵盡
率率禮無違長信歸尊因心則感內成則仁叙九族外平
則義協萬方厚俗則寵及高年廣孝則榮加錫類能刑則
朝無隱慝善任則野無遺才修文則戎蠻來王整武則南
北繼提此皆事光日月聲洽寰區黔首之所謳誦縉紳之
所拊歎其或機叅造物意兆先天事隔於人謠功隱於朝
聽者若非奉職之臣官業所及諫無德而稱焉臣以庸劣
謬膺寄任調盈虛而馭輕重關成敗而繫安危職思其憂
夕惕若厲每因整率彼竭愚忠亟奉溫顏累承眷旨有以

知造化之意有以見天地之心曠若發蒙折如愈疾管窺
所至可得而言昨者臣以潮州刺史李璿撓縱私鹽耗廢
公利請從免職以儆慢官陛下以為法令更改且當申諭
道途悠遠客或未知俾為後圖用緩前責弘恕包於廣大
明察貫於精微此則群臣不可望清光者一也江南西道
觀察使楊憑奏以支郡早歉經賦不充請征居地之羨且
修稅茶之法陛下以為天災流行有時而息人怨帶結貽
患則深縱無日新之美恩復已除之弊特令寢奏姑務流
通有司知畫一之方販負有昭蘇之望此又群臣不可望
清光者二也臣嘗使推官殿中侍御史崔太素奉使淮南
臣以其名秩甚卑濬決務重徵令郡縣整訓役徒須示等

錢遵王述古堂藏書

威請賜章服陛下以為職任伊始勤効未成必有可觀乃
申後命以再陳所切方可其奏雖事從權輿且符濟物之
宜而賞不僭行已見永圖之旨此又群臣不可望清光者
三也臣對揚之日親奉德音知臣使司支計闕少必擬昭
明儉德振起素風率身為天下之先節用自宮中而始又
云臺殿舊制已當惕慮經營改作非所措懷將不崇三尺
之階豈復議十家之產發自宸念形于天顏意開而河海
自清言出而神祇知感此又群臣不可望清光者四也陛
下光臨大寶星歲將周貴戚之賜與無聞恩幸之霑濡殆
絕至于贍軍供國行賞報功則必鴻毛府庫糞土金玉遂
使夏州諸將恨效淺而恩深劔外三軍知生輕而義重此

又群臣不可望清光者五也夫唐虞盛烈文武餘風莫不傳諸聲詩布在方冊且匹夫匹婦片善必書飛羽沉鱗一祥皆紀况陛下動闡教化信在政刑理泰至道之精躬行盛德之事而冲虛謙讓鬱而未發將何以光揚藝祖昭示後昆伏請宣付史官永為代法臣幸蒙恩遇獲奉昌期言必親聞事皆目覩分深骨髓義激血誠輕躋宸嚴魂首飛越

代國子陸博士進集註春秋表

臣聞惟眷作聖觀乎人文達則化成窮則垂訓先師所以祖述堯舜志在春秋懸衡百王撥亂三季正大冠之本清至公之源通群方以誠貞天下於一動無不順道德之玄

錢遵王述古堂藏書

機斷無不濟帝王之利器而梁木既壞生知蓋寡三傳得失索隱未周群儒異同致遠皆泥沒微言於滋蔓亡要旨於多岐與室不闢漫逾千祀天其或者將有俟焉伏惟陛下德合乾坤明並日月氣和物茂遠至邇安欲以人情為田講學而稱鎮定皇極輝光時雍道之將行實在今日臣不揣蒙陋斐然有志思窺聖奧仰奉文明以故潤州再陽縣主簿臣啖助為嚴師以故洋州刺史臣趙匡為益友考左傳之疎密辨公穀之善否務去異端用明本意助或未盡敢讓當仁匡有可行亦刈其楚輒集注春秋經文勒成十卷上下千載研覃三紀玄首雖白濁河已清微臣何幸與道相遇竊以德之匪隣骨肉無應道苟訢合古今相知

然則堯舜之心非宣尼不見宣尼之志非陛下不行庶因
儀鳳之辰永洗獲麟之恨且臣官忝國學思非出位道為
家寶罪實欺天謹昧死寫前件書詣東上閣門奉進伏候
聖旨

代齊賈二相賀遷二祖表

臣伏見今月十四日制命以尊親之義度附懿祖獻祖於
德明興聖廟室正太祖元皇帝東向之尊者十五日奉遷
事畢十六日給饗禮成日月貞曜乾坤定紀稱情靡忒合
敬有歸百神得受職之方萬國知來祭之本中謝臣聞國
有事莫大於嚴祀祀有經莫崇於尊祖夏殷得之以繁社
周漢用之而休明爰自魏晉迄於隋氏或以祚短而不反

錢遵王述古堂藏書

祧正或以時難而未遑討論絲綸興謝綿曠載祀竟虛盛
美允厲昌期陛下道冠前王慶殿累聖奉無競之烈克廣
洪休瞻有赫之靈思正大典精誠感念旰食疇咨內斷皇
明俯裁群議奉祖宗於常尊之地定昭穆於式序之宜清
廟肅雍玄空保祐奔走夷裔鼓舞生靈煥乎觀一代之光
盛矣接千年之統臣等自鍾舛薄坐嬰衰瘵不獲躬執籩
豆稱慶闕庭誠仰聖敬感深孝理形留神往倍百恒情

謝拾遺表

貞元十九年

伏奉制命授臣左拾遺又中使毛進朝至宅奉宣進止賜
臣本官告身者澤濡窮鱗雷起幽壑塵忝近侍冠軼常倫
震驚失圖兢跼罔據中謝臣常學舊史承訓先臣皆以奉

上自致為榮附下苟進為恥臣所以既孤之後義不依人
賣洛中薄田歸闕下之舊宅退藏其跡私誓于心不邀利
於權門不求名於衆口星霜苦節夙夜精誠唯願投軀盛
時自結明主愚誠神感人欲天從果蒙陛下自記姓名猥
憐孤直振零丁於絕望投曉昧於無陞獨斷皇明起寘清
列俯降中貴內賜官告特違恒例光寵賤臣俾其不出戶
庭坐生羽翼萬乘知已一鳴驚人公朝得盡節之方私室
無謝恩之虞顧唯凡瑣叨此殊尤纏激血誠銘鏤膚骨株
拔恩重泥塗感深畢性命以為期裂肝膽而何述唯當竭
誠陳力效節明忠使丹心有孚白首無黜然後敢望披雲
捧日一識天顏則盍門之灰粉如歸百生之至願斯畢無

錢遵王述古堂藏書

任感恩榮耀之至

御荅

卿克修學藝信稟溫良是用命官列于近署 惟朝典煩
有表章所謝知

謝章服表

今月二十一日高品薛盈珍至鳳翔府奉宣進旨賜臣緋
衣魚袋笏并袋紫衣一副者發揚宸念照灼恩光瞻奉自
天戰跼無地中謝臣孤陋無取過蒙獎錄聖慈周洽天造
曲成恩重出疆俾諧畫飾九重清秘不忘絕域之單車萬
乘憂勤特記微臣之命服衣分內府錫及近藩未申汗馬
之勞遽冒濡鵲之刺在笥增感撫躬若驚頌越兢慙因知

攸措

代孔侍郎蕃中賀順宗登極表

六月十四日入蕃告哀使左金吾將軍兼御史中丞田景
度至吐蕃列館伏承皇帝陛下以正月二十六日明德奉
天纂臨宸極重光昇曜百化維新澤被幽遐慶覃動植中
賀臣聞和氣既蒸勾萌必達時雨將降柱礎猶知臣從單
車閑留絕域天臨日照而別處幽陰雷動幽陰而兀為聾
瞶伏願陛下義敦柔遠體及窮荒始獲虔奉德音仰沾聖
澤具寮就列無階蹈踴之初庶物效靈獨在飛沉之後舛
薄鐘命耻玷自躬疚心厚顏固知攸措今月七日自列館
廻至河州大夏川即以十二日進發星言夕惕莫敢違寧

錢遵王述古堂藏書

瞻望闕庭載深感躍無任喜抃屏營之至

代文武百寮上尊號第三表

臣等自管窺天以凡揆聖度奉徽號整陳至誠而再降謙
光未迴宸睟慙局固據彷徨失圖中謝臣聞強名曰道莫
體混元之功推大于天章執大成之德徒以物觀德視人
津涯俾其會歸有所則象伏惟皇帝陛下克廣蕃圖紹休
聖緒順考古訓茂宣重光亭毒以佐天和震曜以除人害
性與道合身為化光神行六幽威動九服求珠赤水觀妙
用于無方檢玉名山告成功而有日豈可過損盛德不照
鴻休弃臣子滙血之誠阻華夷傾首之望當仁必受乃曰
至公與物無私寧嫌在已安卑者地山岳之峻豈慚好謙

者天日月之光何讓道貴傳繼禮从宜稱邦家之舊典不
可以廢天人之合應不可以違臣等繆服官常親承至化
一披肝胆三清宸嚴殫越為期俯伏以俟實望陛下隨時
立教以欲從人遊神于不宰之鄉屈已于有名之域潤色
大寶發揮皇猷古今一時天下幸甚

代文武百寮謝宣示元和觀象曆表

臣等言伏見今月十三日宰臣奉宣聖旨以肇建元和惟
新寶曆極其幽順冠以睿文思示具寮慶昭萬國中謝臣
聞清濁既判象數相生一元起於帝圖三統成於人道形
器之表推步而得恍惚之際鉛銖不差有開必先聖作物
觀伏惟皇帝陛下誕膺駿命敬授人時爰詔日官底定曆

錢遵王述古堂藏書

法啟開元氣節宣群生役五行于文字貫七曜於珠璧仰
觀俯察允協於神休東作西成永貞於農候感動夷夏歌
舞飛沉天子之大政行焉聖人之能事畢矣臣等幸備朝
序親奉昌期竊見天心敢迷日用無任蹈詠之至

代文武百寮賀放浙西租賦

臣聞等言伏見今月十五日制命以天下經賦首於東南
浙右諸州荐罹災歎全以逋債大數湛恩人謠勃興朝聽
震動中賀臣聞三王已降綿曠于祀為邦之政盡在欲理
之主甚衆莫不知傳戒獨豐語稱與足至於愛人節用之
際約躬紓國之時則必情隨事遷以欲忘道故曰人鮮克
舉行之惟難伏惟皇帝陛下濬發睿圖紹休聖緒躬將慈

儉子育困窮皇明燭幽惠訓不倦撫臨萬國曾未再周深
求疾苦之源屢下蠲除之詔裁戎祀之經費減乘輿之服
御雖邦計之有羨入憂于未憂雖生人之所樂輸損之又
損風行號令日貫精誠明神聽其德音和氣生於文字將
舟車所及咸升至理之期豈江湖下方獨被曲成之澤臣
等尸素有日獻納無聞尚勞聖心軫恤人隱甘同凡品不
敢望於清光竊與疲吐并謝生於玄造無任感抃之至

代文武百僚謝許遊宴表

臣某等言今月二十三日宰臣奉宣建止如聞百寮士庶
等親友追遊公私宴集及晝日出城餞送每慮奏報自今
已後各暢所懷者志存必信義切同休令行如春神應若

錢謙王述古堂藏書

響寒木暉潤嚴風變和推已感於人心發生先於天意臣
某中謝臣聞與人同其樂者不必盡致於韶夏之度在夫
不奪其歡而已與物致其誠者不必日効於丹青之信在
夫不察其細而已况乎緡紳之樂名教聚皆以類臣子之
事君父遊必有方豈足輕聳物情遠塵天聽伏惟皇帝陛
下光纂十聖威臨萬國神武功就人文化成窮溟無波豐
歲將宴樂奏穆清感深乎共樂之道駕言遊幸思所以適
人之方爰詔輔臣式將明命優諭卿士達於庶人琴筑追
遊無憚京輶輜輶送遠勿限嚴城禁吏司之苛察盡朝野
之歡泰始覺飛沉之樂宇宙之寬物不自疑人知得所在
宗載考夜飲承湛露之恩求友相鳴時宴奉需雲之慶浹

休聲於夷夏蒸喜氣於山川千載之昌運允符百王之遺
美斯舉臣等謬膺寄任親奉休明方感生成之德更蒙優
貸之詔恭承睿旨務竭歡心飽思屬厭醉念溫克戒竹林
之虛誕去金谷之浮華君雖不察於泉魚臣敢有愧於屋
漏承歡且懼居寵彌驚稽首知慚殺身何報無任感恩競
惕之至

代文武百寮進農書表

臣某等言臣等伏准故事每年二月一日以農務方與今
百寮具則天太聖皇后所刪定兆人本業託奉進者中謝
臣聞不愛牲玉所穀于圓丘可以致誠未足以勸為躬秉
耒耜籍田于千畝可以示勸未足以教人必也殷天地之

錢遵王述古堂藏書

和順陰陽之理利其器用精厥法式變之而不倦動之而
不勞四海靡而風行百姓迷其日用弘我政本實惟農書
伏惟睿聖文武皇帝陛下德茂生成道光慈儉捐金而寶
穀菲食而粒人考堯典以授時稽禹貢而任土潔粢盛而
大事在祀銷劔戟而盡力為農豐年屢薦於郊歌嘉瑞繼
光於國史而不自滿假惟懷永圖每至獻歲載陽仲春初
吉俯察土膏之候仰觀晨正之祥經始歲功導揚生德徵
有司之舊典奉先后之遺文深居穆清親覽典妙匪崇朝
而盡更田畝不出戶而遍洽人情見粹草垆土之艱知寒
耕熟耘之苦宸心感念剛畝昭蘇一歎而時雨先飛三復
而春雷自起臣等業慙學稼祿過代耕親承務本之風日

奉在勤之訓三時不害觀玉燭於氤氳九扈孔脩賀生靈
於富庶謹繕寫前件書凡二十篇共成三卷謹詣東上閣
門奉表陳獻以聞

代杜司徒謝上表

臣某言伏蒙聖恩以臣父更重職謬踐中台爰詔有司俾
撰良日授節冊命備禮蒞官當千載之休期復三公之故
事俯樓恭命震驚失圖中臣聞官以昭德物以表功賞
不僭行禮無虛設臣職非經遠才乏將明階緣恩遇叨歷
寄任踴躍三紀祗事四朝徒竭筋力之勤曾無塵路之効
陛下矜其衰疾許釋煩重而猶委代天之務正論道之司
拜冊彤庭奉謁清廟被之法服導以羽儀會府宿設群官

錢遵王送古堂嘉書

序送降德音于中貴分肴醴於御厨事出殊恩動為榮觀
禮成而退身驚日月之光寵極自思心醉雲天之澤素髮
垂領華袞在躬喜過生悲感深以泣雖志同犬馬願奉主
於無疆而年在桑榆將報恩而徇力無任感抃屏營之至

代杜司徒賀赦表

臣某言伏見今月二日制書改元和大赦天下新雷雨
之澤重日月之光仁被幽遐慶覃動植三元經始萬化惟
新臣某誠歡誠抃頓首頓首臣聞義軒取字堯舜為君德
莫盛於好生政莫弘於在宥然而事資體要理極精微百
王所難千載斯遇伏惟皇帝陛下纂臨大寶光啟曆圖當
獻歲之元順陽春之氣朝前殿御正門發德音布慈旨明

大孝之本褒至忠之後省徭捐稅以清疾苦之源蕩累滌
瑕以厚廉恥之俗往典之所未舉前代之所未該莫不悉
出宸衷咸歸聖政坐聞仁壽之域行見雍熙之期凡在生
靈孰不慶幸况臣陳力歲久受恩最深而蒲柳餘年犬馬
多疾不獲奉觴丹陛蹈詠康衢猶蒙天春留 聖慈曲至
特降中使俯加慰勉衰憊增氣枯朽生光施重丘山感深
骨髓闔門反粉豈足止報無任喜懼屏營之至

吕和叔文集卷第四

錢遵王述古堂藏書

